

# Festival Nacional di Teatro na caminda cu Festeseco III



Seccion Hubentud den Movecion a busca informacion cerca Stanley Damian, productor di teatro na Instituto di Cultura, pa duna siguimento na e desaroyo di Festeseco III, cu no ta nada otro cu e Festival Nacional di Teatro cu e aña aki ta pone enfasis riba nos hubentud. Festeseco ta un number crioyo pa "Festival di Teatro Sembra y Cosecha", cual riba su mes ta nifica cu loke nos ta haci awe nos lo disfruta di dje mañan. Durante aña pasa tabata tin hopi preparacion haci pa cu e festival nacional di teatro pa hubentud aki. Den luna di november durante e siman di 25 pa 30 tabata tin presentacion di e nueve obranan cu lo participa den Festeseco III, na Artesania.

Esaki relaciona cu e "Trabao den Progreso" un parti di e festival caminda actor y directornan di grupo por a topa otro. Nan a presenta e obranan te asina leu cu nan a yega. E publico, consistiendo pa un gran parti di actor y directornan di e otro gruponan a duna evaluacion na e dos gruponan cu a caba di presenta. E siman aki tabata sumamente educativo y exitoso. Pa e actornan cu a presenta pa prome biaha, a haya un chens pa experiencia esaki prome cu nan bay pa e estreno den e festival cu lo tuma lugar e dianan 30 y 31 di Januari, 1 y 2 di februari, na Cas di Cultura. Cada director tambe a haya un oportunidad pa sinta y wak

su obra sin duna ningun comentario. Por ehemplo, e siguiente aspectonan a bin dilanti: - E actornan mester a entrena nan stem un poco mas - E final di e obra mester ta clop cu loke e grupo kier trece dilanti cu e resto di e obra. - Cada obra tabata totalmente diferente. - Den e gruponan tin hobenan mas chiquito, otronan mas grandi y tambe tin grupo di tur edad. Director, actornan y e team di produccion a haci un tremendo esfuerzo pa finaliza tur cos mas tanto posible pa e siman di "Trabao den Progreso". Artesania a ser cambia den un teatro sublime. Pesey ban duna apoyo na e trabao grandi cu a ser haci pa e realizacion

di e Festival Nacional di Teatro aki, specialmente mirando e hecho cu e festival aki ta dirigi riba y door di nos hubentud.

E obranan ta creacion propio di e directornan kendenan a sigui e siguiente cursonan cu a forma parti integral di e proyecto:

"Skirbi bo obra" cu a ser duna pa Laura Quast y Diana Lebac; "Crea Decor" bao guia di Glenda Heyliger; "Actuacion", y "Direccion" ambos dirigi pa Amy Lasten.

For di semianan aki cosecha 9 obra pa publico en general, amantenan di teatro en especial, y particularmente pa nos hubentud.

Tambe a conta cu colaboracion di un director di teatro cu

a bin for di Hulanda, cu ta Dennis van Galen, y tambe di un director di teatro profesional procedente di Cuba cu ta Gloria Bryce.

Den nos proximo edicion di "Hubentud den Movecion" nos ta bay referi na e temanan di cada obra cu Festeseco-III lo presenta, y desde awor aki, Seccion Hubentud den Movecion kier a encurasha pueblo di Aruba en general y hubentud en particular pa asisti na Cas di Cultura y forma un publico grandi y entusiasmado pa duna apoyo y aplaudi nos talentonan nacional. Teatro ta cultura, y un parti fundamental di educacion y entretenimento di un pais. Ban yuda engrandec nos teatro local!!



**GARAGE CENTRAAL**

Sabana Blanco Tel: 826-262  
Habri Diasabra 9 am - 1 pm



**ATENCION**

**Entrante 5 di Januari 1998**  
**Allard van Putten no ta den**  
**servicio mas di Garage**  
**Centraal Aruba N.V.**  
**Allard van Putten no ta**  
**autorisa pa haci pago of**  
**ricibi pago den nomber**  
**Garage Centraal Aruba N.V.**